

RESTAURIMI PLOTËSUES

Në vazhdim të analizës për gjendjen e trashëguar të monumenteve në vendin tonë konstatojmë se shumë monumente kanë arritur në gjendjen e sotme me pjesë të humbura ose pjesë munguese.

Në të tilla rrethana ndërhyrjet plotësuese, ose restaurimi integruar ishte i pashmangshëm, por gjithnjë duke argumentuar se *kur dhe pse* mund të pranoheshin ndërhyrjet e tilla. Pra sa *të dhëna të sigurt* kemi që të mos binim në ndonjë ndërhyrje false, dhe, për shkak të pjesëve të humbura sa është cenuar uniteti ose tërësia e një monumenti në aspektin estetik, të qëndrueshmërisë, të funksionimit normal të monumentit, si dhe me ndërhyrjet tona sa mund të siguronim përmirësimin e unitetit ose të tërësisë së monumentit.

Cilat janë kriteret shkencore ku mbështetet restaurimi plotësues.

Cesare Brandi në veprën e tij *“Teoria del restauro”*, në kapitullin *“Vepra e artit si unitet”*, thekson se: *“ndërhyrjet restauruese duhet të drejtohen në zbulimin dhe rikthimin e unitetit potencial të veprës”*.

Neni 12 i Kartës së Venecies përcakton:

Elementet e destinuara për të zëvendësuar pjesët e munguara duhet të integrohen harmonikisht me tërësinë, gjithmonë duke u dalluar nga pjesët origjinale

Ndërsa në Nenin 13 thuhet:

Shtesat nuk mund të lejohen veçse në masën në të cilën ato respektojnë të gjitha pjesët interesante të godinës, kuadrin e saj tradicional, drejtpeshimin e kompozicionit të saj dhe raportet e saj me ambientin rrethues

UDHËZIMET E ICCROM, UNESCO, ICOMOS

Riintegrimi modern, apo plotësimi i pjesëve munguese përgjithësisht është i pranueshëm për sa kohë që ekziston një unitet potencial që krijon baza të qëndrueshme, të cilat lejojnë të ndërmerren këto veprime. Trajtimi i pjesëve të humbura bazohet në një vlerësim të kontekstit të tyre dhe ato duhen riintegruar duke u bazuar në dokumentacion. Nëse riintegrimi nuk e përmirëson unitetin potencial të veprës...atëherë ky nuk do të ishte një veprim i përshtatshëm

E thënë ndryshe riintegrimi mund të kryhet atëherë kur për shkak të pjesëve të humbura cenohet tërësia e një monumenti në aspektin estetik, të qëndrueshmërisë, të funksionimit normal të monumentit, ose kur pjesët e humbura dëmtojnë së tepërmi ansamblin ku ato bëjnë pjesë.

Por si realizohet riintegrimi.

Le ti referohemi përsëri teorive dhe udhëzimeve të sipërpërmendura, të cilat venë në dukje se:


“...çdo plotësim duhet të jetë njëkohësisht edhe lehtësisht i dallueshëm nga origjinali, në mënyrë që restaurimi të mos falsifikoje dëshmitë artistike apo historike.

KISHA E MARMIROIT, VLORË

Kisha e Marmiroit ngrihet mbi një çukë të vogël në afërsitë Orikut. Njihet nga banorët e zonës me emrin e Marmiroit, i cili del në burimet historike në vitin 1307.

GJENDJA EKZISTUESE


Monumenti u gjet në gjendje mjaft të dëmtuar, me pjesë gjysmë të rrënuara dhe me të çara të konsiderueshme në muraturën e tij.





Fuga të qarta në muraturë dëshmonin se në një kohë të dytë monumentit i ishin bërë mbushje me muraturë lehtësisht të dallueshme nga jashtë dhe nga brenda, të cilat ja kishin transformuar formën fillestare të tij. Duket se këto mbushje ishin bërë për të konsoliduar gjendjen e dëmtuar statike të ndërtesës dhe jo për qëllime funksionale apo nevoja liturgjike.

Në gjendjen fillestare kisha i përkiste tipit në formë kryqi të lirë me kupolë, me krahë jo të barabartë të kryqit arkitektonik. Kemi të bëjmë pra me një shembull të rrallë të këtij tipi, që, së bashku me kishën e Manastirit të Zvërnecit, janë të vetmet monumente të tipit në formë kryqi të lirë të periudhës bizantine që njiheshin në vendin tonë.



Projekti i restaurimit

Duke marrë parasysh rrezikshmërinë në të cilën gjendej monumenti, projekti i restaurimit synonte konsolidimin strukturor të ndërtesës për t'i kthyer asaj aftësinë mbajtëse. Mbase u arrit qëndrueshmëria statike e monumentit dhe muraturat shtesë e humbën tashmë funksionin e tyre mbajtës u diskutua heqja e tyre



MONUMENTI PAS RESTAURIMIT

Rezultati i pritshëm ishte i një rëndësie të veçantë për tipologjinë e arkitekturës së kultit të periudhës bizantine në vendin tonë, ndërsa plotësimi i pjesëve munguese jo vetëm ishte i nevojshëm për konsolidimin statik të monumentit, por e bënte më të perceptueshme tërësinë kompozicionale të tij me tërë mundësinë për t'u vlerësuar.




MANASTIRI I SHËN GJERGJIT, DEMA, SARANDË



Manastiri i Shën Gjergjit të Demës pranë Sarandës është një nga manastiret më me interes të periudhës pasbizantine që ruhen ende. Ai paraqet jo vetëm vlera arkitektonike, por dhe ambientale. Zotëron majën e një kodre që ngrihet në rripin më të ngushtë të tokës ndërmjet detit Jon dhe liqenit të Butrintit në krye të gadishullit të Ksamilit. Në këmbët e kodrës së manastirit kalonte një mur barierë nga liqeni deri në det, i cili shërbente për të fortifikuar territorin e qytetit antik të Butrintit.



Gjendja ekzistuese



I ndodhur në një pikë strategjike, këtë manastir deri nga fundi i viteve '80 e kishte në përdorim një repart ushtarak dhe ishte “Zonë ushtarake”, kështu që punimet e mirëmbajtjes ishin të vështira të kryheshin. Por edhe mbas largimit të repartit ushtarak nga manastiri, për një kohë të gjatë munguan përkujdesjet konservuese, duke sjellë si rezultat jo vetëm thellimin e dëmtimeve të strukturave konstruktive, por, ajo që është më e rëndë, humbjen e shumë elementeve arkitektonike të ndërtesave.







ANALIZA ARKITEKTONIKE

Manastiri i përket tipit të manastireve të fortifikuara. Një mur i fuqishëm rrethon kompleksin e manastirit. Ai është i pajisur me kulla dhe frëngji të shumta. Porta e hyrjes për në manastir me mbulesë të harkuar mbrohej me frëngji dhe mashikulla



Kisha e manastirit (katolikoni) përbëhet nga naosi dhe nartekso, i shtuar në një fazë më të vonë në anën perëndimore. Naosi i përket tipit të kishave njënefëshe me kupolë. Zgjidhja e bërthamës qendrore, e mbuluar me kupolë, është unike në kishat pasbizantine. Për të arritur në diametrin e dëshiruar të kupolës, kalohet nëpër një sërë bërthamash katrore, të brendashkruara tek njëra-tjetra.





Karakteristike për këtë monument është furnizimi me ujë. Një ulluk në faqen perëndimore mbledh ujërat e shiut dhe i dërgon në sterë





“Kulla” ose ndërtesa në anën juglindore të kishës ngrihet në pikën më të lartë të oborrit të manastirit dhe prej andej hapet një pamje e gjerë e peizazhit rrethues. Ajo është dykatëshe dhe ka trajta të mbyllura. Hyrjet për në katet janë të veçanta. Në katin e sipërm të çon një rampë shkalle guri e jashtme, sheshpushimi i së cilës mbahet me qemerë. Sistemi i qemerëve gjatë gjithë anës perëndimore dhe gjurmë të tjera dëshmojnë se përpara hyrjes ka qenë zhvilluar një hajat i hapur.

Teknika e muraturës është e mirë dhe përpunimi arkitektonik është i pasur me elemente dekorative. Dallohen në mënyrë të veçantë kornizat që përfundojnë muraturën, hyrjet dhe dritaret, të cilat përmbajnë konsola në pjesët e poshtme të tyre.






Shtrim dekorativ i oborrit



Ndërtesa në anën jugore, ose “konaku” ka një karakter tjetër arkitektonik. Ajo ka një zhvillim gjatësor dhe trajta të hapura. Është dykatëshe me galeri të hapura në të dy katet, tipike për ndërtimet monastike. Në katin përdhes arkada mbështetej në pilastra të trasha, ndërsa në katin e sipërm mbi kolona të holla guri. Qelitë e vendosura në katin e sipërm komunikojnë me galerinë e hapur, ndërsa ambientet e katit përdhes kanë qenë përdorur për depo.

PROJEKTI I RESTAURIMIT

Braktisja për një kohë të gjatë e manastirit, mosfunksionimi i tij dhe mungesa e përkujdesjeve mirëmbajtëse kanë bërë që ky ansambël monumental të arrinte deri në ditët tona në gjendje të mjeruar dhe gjysmë i rrënuar. Dëmtimet shfaqeshin si në strukturat konstruktive të ndërtimeve, ashtu dhe në humbjen e shumë elementeve arkitektonike. Kriteret për konsolidimin dhe restaurimin e kompleksit të manastirit janë përcaktuar nga gjendja statike e ndërtimeve përbërëse, nga njëra anë dhe, nga ana tjetër, nga përdorimi i ardhshëm i tij.



Gjurmët ekzistuese



MONUMENTI PAS RESTAURIMIT







URA E MOSTARIT, BOSNJË-HERCEGOVINË



Ura e vjetër e Mostarit mbi lumin Neretva në Bosnjë-Hercegovinë është ndërtuar në shek. 16 (1565), nën mbretërimin e Sultan Sulejmanit të Madhërishëm. Arkitekti ka qenë Mimar Hajredini, nxënësi i arkitektit të shquar Mimar Sinanit.

Ura u shkatërrua më 8 nëntor 1993 nga forcat kroate gjatë konfliktit të armatosur kroato-boshnjak.

Ajo është me një hark të vetëm në formë samari, me hapësirë drite 27 m, me gjerësi 4 m dhe me 29 m lartësi mbi nivelin e lumit. Mbrohet nga dy kulla në dy brigjet e saj. Është konsideruar si shembull i jashtëzakonshëm i arkitekturës osmane në Ballkan.



Si një vepër kryesisht inxhinierike, ura shquhej nga vlerat e padiskutueshme të zgjidhjes konstruktive. Prandaj riintegrimi, ose restaurimi plotësues, duhet të nxirrte në dukje këtë vlerë të monumentit. Kjo mund të arrihej vetëm duke përdorur të njëjtën teknikë, material dhe skemë konstruktive, në mënyrë që të përmirësonin unitetin e pritshëm të saj. Çdo mënyrë tjetër restaurimi do ta kthente këtë objekt në një urë të zakonshme, gjë që do t'i humbiste atë madhështi dhe bukuri që ruhej në kujtesën e banorëve dhe vizitorëve të shumtë dhe që mbahej si simboli dhe krenaria e qytetit. Restaurimi i urës përfundoi në korrik të 2004.



